

## Gieri Gienatsch vegn exhumà per la segunda giada

■ (cc) En la catedrala da Cuir vegn averta la fossa probabla da Jörg Jenatsch (1596–1639), in dals manaders da las truppas grischunas en la Guerra da trent'onns. Tenor l'istorgia è Jenatsch vegnì sturnì il favrer 1639 – durant il tschaiver – cun ina manera ed alura sepulì en la catedrala. Ussa lascha il servetsch archeologic dal Grischun evaluar il cuntegn da la fossa. Già l'onn 1959 aveva l'antropolog turitgais Erik Hug exhumà la bara. L'identificaziun è succedida sin basa da la

vestgadira e d'ina fractura da la chavazza. Igl è però restà intschert sch'i saja efectivamain vegnida chattada la dretga bara. Ussa duain vegnir gudagnadas novas enconuschientschas antropologicas e patologicas areguard statura, schlattaina u blessuras. Ina funtauna per l'identificaziun è anc adina la gardaroba. A maun da restanzas da sang sin parts dals vestgids duai vegnir fatg in profil dal DNA e cumpareglià cun ils profils da descendents da la famiglia Jenatsch che vivan anc. Per-

quai ch'i sa chattan mo pitschnas restanzas da sang sin la vestgadira han ins ussa – cun la permissiun d'uvestg *Vitus Huonder* – avert la fossa per survegnir ulteriuras emprovas da DNA. La chavazza è vegnida purtada en l'ospital chantunal, nua ch'i vegn fatg in scan. Quel serva alura sco model traidimensiunal per reconstruir la fisionomia presuntiva ch'il mort aveva sco viv. Per prender resguard da quels che van en baselgia han las lavurs da perscrutaziun vi da la fossa durà mo in di.